

## **Plenchi**

### **Bèl a bati**

**TRINGG TRINGGG bèlèm..... TRINGG TRINGGG bèlèm.....Sendé sendé nos ta riba nos plenchi di skol. Bria nos ta keda bria ku tur e streanan den nos skolnan. Ta ken por ku nos. Dal bo brel di solo si e lus ta muchu skèrpi pa bo. Paso ta unda ku bo bira ta lus bo ta mira. Un tremendo tumba pa nos karnaval. Nos ta sende lus di positivismo, di amor, di kompreshon i di koperashon. Ban sende lus riba nos trato pa ku otro i kita e lus for di riba nos mes. Ku a sakamentu di selfi nos a kai den e era di ami ami i ami. Anto ku photo shop ta pió. Nos ta saka nos potrèt, drech' é pa nos mostra mas mihó i post e pa mundu ammirá nos. No ta focus mas riba nos alrededor i buska e beyesa nan natural rondó di nos. Ban sende lus riba otro pa asina nos por drecha nos relashon ku nos yunan, kasa, famia i amigunan. Buska nan puntonan positivo i ban apresia nan. No ta aprensia, ta mas importante sino nos kurason i trato pa ku otro.**

**Ban sende sende, sende lus di positivismo i bria e temporada aki.**

### **Den agènda**

#### **Liber di skol:**

**Febriari dianan 5, 12,13,14 pa karnaval.**

**Mart dia 26 pa aprel dia 4 Pasku Grandi.**

#### **Liber nashonal:**

**Febr 12 pa Karnaval grandi**

**Mart dia 30 Bierne Santu**

**Aprel dia 2 Dos dia di Pasku Grandi.**

## Not'é riba bòrchi

Aki nos por apresia alumno Cameron Olaria na momento ku el a risibí su sertifikado di dia di alumno na "weekopening" i tambe a risibí otro sertifikado for di Kiwanis (Mr. Marlon der Meer ) pa proyekto Hóben destaká. Esaki tabata un akto masha bunita i emoshonante pa e hóben ehemplar aki.



## Riba rapòrt

Masha pabien na Gian van Eiken ku a resultá rei di tumba hubenil 2018. Título di su tumba ta “Bichi kolorido t’ei pinta kaya”. E komposishon ta di Danny Yanga i areglista ta Ravello Antoin. Masha pabien na e hóben talentoso.



(potrèt di Ministerio di enseñansa)

## **Mi ta konta**

### **Alumno Charayneli Sint Jacoba di Glorieux College.**

Tur loke bo planta bo ta kosechá. A toka turno pa nos yu ku ta alumno na Glorieux College wòrdu rekonosé. Ta un honor pa wòrdu rekonosé na un edat di 8 aña. E la wòrdu rekonosé komo e mucha ehemplar 2018 di Glorieux College. Ku un kurason humilde y su bon obra nan tabata e yabi pa a haña e rekonosementu aki. Pa 2 aña sigui Neeny, nos yu, ta bisa nos pa drecha dos pan pa e por kome. Te ku un dia e la disidí di bisa nos ku ta pa un mucha e ta hasié. Na nos turno nos a disidí di drecha dos trònchi pan pa nos yu bai skol ku n'e. Nos a komprondé di yufr ku Neeny ta duna e pan den skondí pa niun mucha no ripará. Tambe e la wòrdu rekonosé pa su kurason kla pa yuda.

E ta kompartí su kosnan pa esun nan ku no tin. E la yega di gana 1000 florin ku modelamentu el a uze pa kumpra paña pa e mucha nan ku no tin. Y awe ta su dia pa wòrdu rekonosé.

Pabien Charayneli i pabien na bo mayornan pa planta un bunita simia



## **Un prenchi**

St. Paulus College Fo ta kontentu ku resultado di tuma hubenil. Nan tin 2 hóben di skol ku a bria ku nan aktuashon.

Zou'kaino Jacobs di grupo 6b ta promé finalista i mihó intérprete.

Keanu Passial di grupo 8a ku premio pa mihó disiplina i premio estímulo.





### **Mucha djispou**

Tata: "Percy! "

Percy: "Ablif Papi?"

Tata: "Mi yu trese algu pa mi baha mi set."

Percy: "Coca Cola o Pepsi?"

Tata: "Coca Cola"

Percy: "Light òf normal?"

Tata: "Normal"

Percy: "Bòter òf bleki"

Tata: "Bòter"

Percy: "Di un òf 2 liter"

Tata: “Awèl trese awa anto, kansa hende kaba”

Percy: “Di kranchi òf mineral?”

Tata: “Mirami un kos aki, pasa bai bo kamber”

Percy: “Awor òf aki ratu?”

Tata: “Pasa, masha lihé.”

Percy: “Mi por bai mi so òf bo ta kompañámi?”

Tata: “Mucha mira pa mi no mester lanta serabu den e kamber ei”

Percy: “Serami ku yabi òf sin yabi?”

Tata: “ **Bo karchi a kaba**”.